

Sunday, August 31, 2025

Time - 2:30pm

## OPS ON DRUGS

IGP Pu H. Ramthlenglina chuan Asia chhimchhak atanga Myanmar kal tlanga ruihhlo lo lut za zela 10 vel chauh man a nih thu a sawi. Mizoram sorkarin naktuk atanga ruihhlo do beihpui a thlak tur atana Myanmar ramri a ruihhlo tawlhna enfiaha kalte chu Aizawlah an lokir leh tawh a. Champhai district-a Myanmar ramri a awm khaw hrang hrang han tlawhtu Police hotute leh central YMA hruaitute Champhai sub headquarters YMA hruaitute nena an inkawmkhawmna-ah he thu hi sawiin IGP chuan ruihhlo chu nasa zawka do a tul thu a sawi a. Champhai chu ruihhlo tawlhna luhka lian ber a nih thu sawiin nikum chhunga ruihhlo thubuai an ziah luh 370 zinga 170 chu Champhai Police ziah luh a nih thu leh kumin January atanga August ni 10 thlenga thubuai 150 chuang ziahluh zing za zela 50 aia tam chu Champhai District-a ziah luh a nih thu a sawi a. Champhai mipui leh khawtlang hruaitute chu theihtawp chhuahpui turin a sawm a ni.

Mizoram-a ruihhlo lo lut hian Khawvel hmun hrang hrang a dengchhuak tawh tih sawiin ramria venhim hna thawktu Assam Rifles-te chu ramri-ah tak taka an duty loh avangin duh duha inkal pawh theih a ni a, hei hian ruihhlo venna kawngah harsatna a siam thu a sawi a. Pu H. Ramthlenglina chuan ruihhlo lo lut tur venna kawnga khawtlang hruaitute thawhpua, an tha tichak turin Police 32 tirhchhuah an nih tur thu a sawi.

Central YMA Asst. Secretary Pu Fabian Lalfakawma pawhin thu sawiin ruihhlo avangin Mizoram chu a la chhe vek lo a, ruihhlo a inhnawnawih lo thalai tam tak la awm mah se, Mizoram hian chhiat lam a pan zel tih erawh hriat a tul thu a sawi.

He hunah hian tlawmngai pawl hrang hrang aiawhte'n thu an sawi ve bak ah, Myanmar atanga ruihhlorawn lut venna beihpuithlakna - Special Operation hi September thla atanga December ni 31 thleng kalpui tura ruahmanna siam a ni a, IGP Pu H. Ramthlenglina ho hian Champhai District chhunga ramri hnaih kuate tunkar chhung khan an tlawh kual a, ruihhlo lo lut tur venna kawnga hmalak dan tur khawtlang hruaitute nen an sawi ho thin a ni.



## PRESBYTERIAN

Vawiin hi 'Ramthar Ni' a ni a, Mizorama Presbyterian Kohhranrawn dintu Rev. David Evan Jones (Zosaphluia) Mizorama rawngbawl tura a lo thlen ni a nih vangin Mizoram Presbyterian Kohhran tan ni pawimawh bik a ni. Kum 1972 Mizoram Synod Inkhawmpui chuan, Synod Ramthar Board-in, 'August 31 Pu Zosaphluia Mizorama a lo thlen ni hi Synod Ramthar Ni atan hman ni se,' tia a rawtna chu pawmin kum 1973 atang khan August 31 chu Ramthar Ni atan hman tan a lo ni ta a ni. Mizoram Presbyterian Kohhran chuan kumin Ramthar Ni pual hian tum khat inkhawm atan programme a siam a, thupui inang tlang 'Pain kei mi tir ang bawkin ka tirh che u hi' tih chu zir ho a ni ang.



## PLASTIC

Durtlang North Local Council chuan khawlaia plastic bottle ruak paih tawh mipuite hnen atangin an lei thin.

He ruahmanna hi Durtlang North Local Council hnuaia Local Health Sanitation Committee te ruahmanna hnuaia kalpui thin a ni a. An vengchhung a lo thianghlma, lo fai zawk theihna tura kalpui a nih thu a hma latute chuan an sawi a. Plastic bottle an lei hnahnun ber ni, nimin khan plastic bottle leh sarang leh frooty/appy bur ruak lirthei trip 4 chuang leikhawm a ni a. Local Health Sanitation Sub Committee member te hian tlawmngaiin bottle ruak lei na tur an thawhkhawm hmanga bul tanin, Local Council sum nena tangkawpin Plastic bottle leina hun hi tum hnih buatsaih a lo ni tawh a, cheng sing 1 chuang man bottle leikhawm a lo ni tawh a ni. Mipui, a bikin naupangte'n he hmalakna hi in an hlut hle tih Durtlang North Local Council hruaitute chuan an sawi a. Plastic bottle Litre 1 chunglam- Rs. 2/- zel in, Litre 1 emaw litre chanve emaw chu Rs. 1/-, Liter chanve hnuaialam - duliin lei a ni a, sarang, appy/frooty bur ruak te kg ah Rs. 30/- in lei a ni bawka ni.

Durtlang North Local Council in plastic an leikhawm hi Aizawl Mayor Pu Lalrinenga Sailo chuan a hmanpui a. Durtlang North Local Council in plastic bottle leikhawm nachang an hria chu ropui a tih thu a sawi a, hei hi a tawpna tur a nih loh thu leh a bial chhung (Ward No. 1) a Local Council zawng zawng - Durtlang North bakah Durtlang, Durtlang Leitan, Leitan Ramthar, Zuangtui, Muanna Veng leh Selesih ah te kalpui vek a nih tur thu a sawi a. Local Council hmalakna chu AMC in theihtawpa a tanpui thin thu leh a tanpui zel tur thu a sawi bawk a ni.

Aizawl Mayor hian a bial chhunga Local Council ten plastic an leikhawmna senso phuhrukna turin Rs. 10,000/- theuh a pe a, a phurhna tur Garbage Truck a ruahman sak bawk a ni.



**AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Zanin dar 6 leh a chanve ah Chanchinthar puan leh a ni ang.



**ANTI DRUG CAMPAIGN**

Nasha Mukht Bharat Abhiyaan champha vawi 5-na pualin nimin tuk khan Mamit Charkawn atanga Field veng thleng ruihhlo do kawngzawh huaihawt a ni.

GSA Payground-ah hemi puala zirlaite tana buatsaih Essay writing leh Poster making competition lawmman semna hun chu district bawrhsap Pu K. Laltlawmlova'n a hman a. Kawngzawh zawh hian hemi pual inkhawm tawi hun hmangin, Mamit district Asst Commissioner, Excise & Narcotics Pu Lalsangzuala Ralte chuan India rama ruihhlo hluarna District 100 thlanchhuah a Mizoram chhung District pathum zingah Mamit chu a tel a, ruihhlo hi thangthar zawkte'n ti ve lo tura do a nih loh chuan Mizoram hi runin min eichhe mek a ni a ti. Ruihhlo chu a tichhinte'n duh hun huna tihtawp leh mai tumin an ti thin a, mahse reilote-ah a bawihah chhuak leh theilo-in an lut thin a, a invenna tha ber chu tih ve miah loh a nih avangin zirlai naupang kalkhawmte chu ruihhlo kaihnauiha hrang hrang laka fihlim tlat turin a chah a ni.

Medical Superintendent Dr. Lalrinfela kaihruainain kalkhawmte'n ruihhlo ti ve lo tura intiam rualna hun hman a ni a. Nasha Mukht Bharat Abhiyaan puala buatsaih ani.

